

國朝詞綜二集

國朝詞綜二集卷七

青浦王昶纂

郭麐十六首

張詡九首

倪稻孫十八首

蕭掄十二首

郭麐

字祥伯號頻伽吳江人諸生有蘅夢樓詞

好事近

深院斷無人拆徧秋千紅索一桁畫簾開處在曉涼池閣  
潛行行過曲欄干往事正思著猶認墜釵聲響卻  
梧桐葉落

卜算子

簾外雨如烟柳外花如雪已是慙慙薄病天又作去清  
明節 昔日結如心今日心如結心裏重重疊疊愁愁  
裏山重疊

憶少年

三巡渌酒三條紅蠟三通畫鼓輕船只三板載桃根歸  
去 天爲濃懽容易曙月朦朧那人窓戶當時已依約  
況夢中尋路

清平樂

小桃如綺命短東風裏薄薄輕寒人半臂且把簾兒垂  
地 春人如許年華春闈幾幅牕紗又是一番寒食不

知多少飛花

賣花聲

十二玉闌干六曲屏山留春不住送春還昨夜梨花今夜雨多分闌珊春夢太無端到好先殘袂衣初換又添綿只是別來珍重意不爲春寒

喝火令

題許校書清露瑤臺圖

鶴背吹笙下橋頭步履通雲鬢霧鬢太玲瓏只恐五銖衣薄曉起不禁風好夢渾難記重遊未易逢鬱金堂北畫樓東記得樓頭二樹碧梧桐記得碧梧桐外兩度月如弓

月華清

詠丁香花

碎翦鮫綃輕含雞舌繁英枝綴如霞百結芳心慣向春  
風凌亂算江南花信更番誰似此香生色淺幽怨共芭  
蕉卷處一齊斜颭 可惜雨香雲淡少月影半牕照伊  
清婉丁字簾前有箇丁娘淒斷想春衫繡上重重怕寬  
了舊時腰襍簾卷又惺忪碎影小庭篩滿

十二時

同湘湄夜坐

疏窓四面秋霖一陣愁人兩箇天涯已腸斷況離情無  
那 桐葉初肥蕉葉大說淒涼也無人和今宵尙相對  
怕來宵燈火

賣花聲

秋水澹盈盈。秋雨初晴。月華洗出太分明。照見舊時人  
立處。曲曲圍屏。風露浩無聲。衣薄涼生。與誰人說此  
時情。簾幙幾重。窓幾扇。說也零星。

摸魚兒

盪湖船

一篷兒。花天酒地。消磨風月如許。吳娃生長吳船上。只  
共鴛鴦爲侶。船六柱。從不識愁風愁水。天涯路。輕橈容  
與問。兩寺東西。半塘前後。商略泊何處。江南好。不在  
中流。簫鼓牽人好夢。無數十年水驛。風鐙夜負了。畫船  
聽雨。臨別語。怕紙醉金迷。忘卻秋娘渡。重來記取。有澹

澹窗紗疎疎簾影隱隱數聲鶯

臺城路 遊舒氏園作

薄陰不散霜飛早園林深貯秋意水木清蒼陂陲高下  
澹與暮雲無際紅泥亭子占一角孤城七分煙水最愛  
疎疎竹竿萬箇滴寒翠年來俊侶都散便登山臨水  
只恁蕉萃倦柳攀條清流照鬢暗老悲秋身世荒寒如  
此又畫角聲中夕陽垂地樹樹西風暮鴉寒不起

翠樓吟

山行幽絕臨水數家門外木芙蓉正花爛漫無次殊愜幽尋紀以此詞同瘦生作

濕翠霑衣暗苔黏屐幽尋最愛清曉峯廻剛路轉恰對  
面數峯清峭似儂曾到只三兩人家看家都好柴門小

芙蓉無數一時紅了 誰料隨意閒行有芳塘花鴨徐  
熙畫稿水邊同照影定見我風前側帽也應含笑怕  
鳥丁寧玉容易老尋芳草向人山色翠眉新掃

買陂塘

茨菇

買陂塘兩邊添種高荷大芋相似生成葉葉雙歧樣合  
傍溪流燕尾江上水記送別西灣話到年時事故人歸  
未正軟柄欲風低枝鬧雨一碧亂無次 江鄉好隨意  
蕪絲菰米食單多在水際雞頭菱角堆盤後草草田園  
風味渾不記合付與厨娘略下些鹽豉旗亭小市共山  
栗燂餘村醪熟後閒買夜來醉



水龍吟

蘋花

菱歌唱斷前溪青山影裏秋江老晚風乍起涼烟不散  
數花開早浴鷺馴時閒鷗眠處采香人少便翠禽一點  
愁他難立除非是轉艇小 有客溪頭垂釣又勾留一  
年過了楊花身世蘆花伴侶嫩寒清曉隨意停舟偶然  
照眼添枝紅蓼向水仙祠下登蘋攀藻共寒泉老

疎影

花影吹笙圖

空庭潑水正玲瓏澹月簾影垂地悵望銀河閒弄參差  
个儂知是誰思橫枝清瘦疎花活漸飾滿薜羅衫子只  
枝頭翠羽雙栖闌見那時情事 難忘黃昏院落畫闌

十二曲曲同倚半攏春纖半度脂香炙暖一行銀字  
年來白石風情減有自譜新詞誰記但每逢花月嬋娟  
便想畫中雙髻

國香慢

夢華以媚蘭小影屬題云前塵影事不能  
去心且他日尋春欲依此求之也

眞色生香有小名錄就雅稱孤芳幽居自憐空谷未嫁  
王昌定記宮牆留字聽鐘聲催月斜廊無言但疑睇一  
寸愁心多少思量彩雲天遠處想明眸秀鬢霧閣雲  
牕玉梅花下誰念蕉萃何郎尙有三生舊約怕錦瑟今  
似人長還應只如此楚楚眉痕澹澹明妝

張

詡

字勿詡號淥卿元和  
人監生有露華榭詞

長亭怨慢

衢州鎖院對雨

正無奈春光都去那更飄來一天淒雨密了還疎數聲  
寫就斷腸譜天涯孤旅有多少傷心處禁得幾時聽想  
到了黃昏更苦 遲暮悵漂零人海長把歲華虛度而  
今倦矣扶不穩風中零絮謾譜徧樂府新題怕錦瑟哀  
音非故臙一縷幽懷呼起子規同語

江城梅花引

閨思

韶華屈指沒三分者消魂最銷魂梅子枝頭酸到倚樓  
心蝴蝶不知春事改度芳草貼湘簾窺翠裙 翠裙翠  
裙錦回文香暗熏麝暗勻瘦也瘦也瘦不去一葉腰身

空說陽臺神女解爲雲長是不眠何況夢欹玉枕數銀  
籤又五更

揚州慢

揚州感舊

朱鳥窓前玉梅花下背人含笑相迎倚東風立穩鎮小  
膽頻驚慣憐我傷心斷句繡牀閑寂掩袖偷吟怨子規  
聲急催教飛絮飄零再來暗訪鎖西風門巷悵悵但  
社燕窺櫺疎花送影似認王孫舊日嫩條飄盡何堪漸  
綠葉成陰料今宵虛閣相思魂顫秋鐙

摸魚兒

笑年來倦鴻蹤跡搖搖眞似蓬梗三千里路飄然返重

國朝詩集卷二  
觀舊游風景天太忍把百五春光不讓三分剩青苔覆  
井悵楊柳絲長桃花命短一片麴波冷紅闌下還繫  
當年釣艇隨風搖漾萍荇幾番凝眺頻搔首祇借遠山  
排悶修竹徑早作就秋聲和淚將愁等魂銷半頃但敗  
粉牆頭一丸冷月照慣可憐影

又吳門喜晤夢華剪燈話舊爲賦此解

甚悠悠半年離別韶光如水偷去飄零如此真堪晒天  
也替人淒楚君記否棹一葉扁舟扶病吳門卧叶可憐  
孤旅任萬喚千呼含愁相對忍淚不能語東風緊早  
送遊雲歸樹相逢一笑起舞胡牀箕踞吹長笛同按玉

田新譜堪喜處是仙骨珊珊久脫風塵苦飛揚跋扈對  
幾疊晴山一江春浪斗酒定須取

風入松

郊城阻雨有懷夢華頻伽曼生

隔窓涼雨纖淒清銷盡客中魂三杯薄酒休成醉到黃  
昏灑作啼痕南雁更無消息東風不管離情十年湖  
海總前因錦瑟感如塵書生命薄同飛絮甫離枝都遣  
漂零今夜幢幢鐙影照來多少愁人

渡江雲

懷米樓

別來安樂否破帽殘衫白眼望青天大江東去水不管  
興亡只是趲華年綠楊城郭甚而今沒箇啼鵲堪憐處

玉簫吹裂雙淚落尊前  
傳言二分月底廿四橋邊可  
也曾相念多應是塞鴻歸盡無計傳箋吳儂近日風情  
減但愁腸蘭燭同煎愁幾許春潮夜夜頻添

祝英臺近

懷鐵門

乍相逢又離別難把斷魂駐冷了清游春色黯然去怪  
伊絲髻飄蕭酒懷消減同一種悲秋情緒  
漂零苦知  
心只有榴花和淚夜吹雨訴與征鴻偏不會人語除非  
澹墨書中桂花香裏把姓字從頭覓取

憶舊游

懷司馬頻庵

記科頭呼酒潑墨題箋耐月中庭轉眼春成夢又片帆

吹去短驛長亭栖栖可憐孤旅雙袖淚痕新最難禁寒  
宵數聲畫角飛落江城 停雲佇天末笑燕去鴻來也  
學漂零遙念蕭齋裏正一鐙紅滴抱膝長吟怕寄相思  
尺素只恐惹愁生待打漿重來一尊同醉秋樹根

倪稻孫

字穀民號米樓仁和  
人諸生有夢隱菴詞

探春慢

李澹畦紹興城西溪至光景奇絕處得香  
草一叢楚楚有致因采歸菴之倩余作此  
慢

獨自攜壺玉梅遲了風光最好容與一點芳心幾痕秋  
意好爲騷人將去無奈漂零久算惟有離憂難訴祇今  
不住深山一溪空漲寒雨 應向雲階月地休忘了盈



國朝詩卷十一  
盈芳訊遲暮夢繞迴欄香和虛幌一徑亂紅無語誰會  
尊前意且重向碧雲延佇日落苔空多少亂山誰主

風流子

辛亥之秋余游嚴江一片孤帆出沒天際  
烟水瓦岸拒霜作花此境殊不多得眷我  
良友潮洞無從因作此詞寄趙白亭振盈  
李澹畦紹城

峭帆吹不落秋江上飄泊認狂蹤看斜逗竹間一痕青  
嶂遠排沙觜幾箇鳥篷晚來好荻花徐弄暝蟹火暗生  
紅斷雁不歸水天空濶野鷗初去涼夢惺忪孤愁憑  
消遣澹烟清鏡裏活畫芙蓉翻歎故人千里雲涯重重  
任胭脂冷落漁歌乍歇權歌又斷月墮波空祇有一雙  
紅豆寄與西風

風入松 舟泊謝邨

一溪寒水浸蘆花溪外暝煙斜冷紅葉葉飄零盡倚枯  
枝半點栖鴉翠袖凭來無力浮雲且住爲佳 白萍風  
冷棹秋槎殘照瀉流霞離情不似將衰柳一絲絲吹老  
年華明日重聞津鼓暮帆何處天涯

琵琶仙

同尤水邨過秋雨庵訪竹溪上人

春未曾歸更留得處處枝頭啼鳥三徑常約君來飛花  
正難掃同訪到荒庵古衲漸風過落紅閒了一榻安禪  
三生話夢情味多少 祇愁是花月匆匆奈愁裏風光  
最悞惱剩有一般心事與爐烟空裊吹不盡垂楊萬縷

說玉關此去人杳但念來日揚州杜門秋老

長亭怨慢

柳影同簷石琴簾堂賦

漸吹滿斜楊官道淺碧留痕夢回芳草淡掃蛾眉遠山  
難得鏡中照綠波簾外知甚處鶯啼曉唱出一枝枝怎  
禁得東風懊惱縹緲望紅樓不見合有凭闌人悄柔  
魂引處又拘管落紅多少恨幾樹隔水桃花笑人面分  
明遮了又一種離情縈滿渡頭歸棹

憶舊游

癸丑北游渡河後旅愁悵觸濁流斷岸對  
之可憐回憶西湖前塵如夢客歲秋晚余  
復浪跡孤城烟月蕩波境難多得故園知  
已徜徉山水間臨風把酒之時亦當念及  
輒紅中人也

記千山暮雨一棹新晴呼我盟鷗綠遍長堤柳說三生  
杜牧多少狂游夜夜故園歸夢飛不到杭州漸草長津  
亭花稀驛路無限閒愁凝眸渺何處尙暗憶年年去  
住扁舟兩槳苕溪月同一丸寒碧孤盪心頭定有相思  
舊侶把酒話清秋怎禁得黃昏燈窻冷暈搖未休

解連環

題衰柳寒蟬畫簷

暗黃千縷到秋來不是舊時眉嫵更那堪抱葉聲沈又  
吟斷夕陽欲飛還住喚起圓蟬怎消受夜涼如許說漂  
零若此欲寫秋疎鬢影渾誤今宵酒醒是處奈村荒  
岸斷水盡流去暮一樹碧到無情怕搖曳驚心此時誰

主冷逼綃痕認猶帶滿身清露惹西風篋中舊愁者般  
淒楚

祝英臺近

題墨蕉帳額爲古愚作

展涼心描綠意搖影上晴戶一翦秋雲吹夢自來去輪  
他翠被餘香疎櫺斷月已消受一分琴趣託豪素畫  
成也似梅花寒約半鉤霧可要聯牀商略舊時雨怎知  
錦字愁新刀環恨杳且料理碧紗深護

一萼紅

將有漢南之行留鳩茲休于陳氏之歸雲  
草堂時春雨不止春愁中人主人季剛解  
元招至江樓觀劇紅氍毹上有月生雲衣  
者中江之翹楚也玉管一聲離人腸斷今  
雨旣集舊雨未來因作此詞寄劉大芙初  
促其早放蘭陵之棹耳

可憐宵花前一夢花影上眉梢月解窺檐雲能送雨愁  
滿杯底紅椒剛說是劉郎來也算劉郎前度已無聊候  
館春生客牕人瘦那不魂銷我憶漢南楊柳又千絲  
萬縷綠到長條渺渺江波悄悄江路去時春也蕭騷有  
誰共江樓惜別有沙鷗還有晚來潮怕得伊人到遲過  
了花朝

法曲獻仙音

江行至鄂渚山水明瑟靜夜月明賦此自遣

高檻排帆小舟扶柁傍晚纔經沙渚樹遠烟平月生波  
濶依稀估客相語好初試單衣立三更已無暑正容  
與怕匆匆萬山過了誰念我重疊一天愁緒眼底是黃

州祗髯仙詞賦千古昨夜空江已翩躚夢化鶴羽忽天  
風吹起定有閑雲飛去

聲聲慢

薄游荆楚暑退涼生東裝北上行有日矣賦此以寫我憂

虛簾送燕遠樹催蟬官齋境轉清幽病起膏騰一枕午  
夢還留漂零那堪重問問此間誰賦登樓而今去祗風  
波滿地人海悠悠回首鄉關迢遞又長安日遠不是  
歡游倦矣浮生孤負楚澤清秋空江峭帆一點認那番  
天際歸舟行怕晚怕西風吹滿渡頭

長亭怨慢

重過琵琶亭

又行盡淒淒三楚倦客單衣薄游情緒縱有琵琶半生

淪落向誰語別離如此盼不到江南樹江上已秋風却  
送我揚舫歸去重住看扁舟來往孃孃豔歌無數青  
衫淚點早吹作去驛亭殘雨算那日一醉成吟便贏得  
風流千古怕幾疊遙山還似秋娘眉嫵

琵琶仙

寄遠

萍雨吹涼又催送一種無根行客書至不奈匆匆情多  
錦牋窄江水遠淮流更遠更添了萬重山色倦柳毵毵  
圓波渺渺清夢難覓我愁是風雪長安幾曾見南天  
冷雲碧多謝玉弦彈怨說梅花消息彈不到瀟湘雁落  
怕鳳池碎恨堆積併作千點相思教伊知得



霜葉飛

黃葉村居圖爲渭符賦

掉頭指處斜陽動西風還又飄去記君尺幅寫家山是  
馬塍西路姜白石寓園在吾杭之西馬塍今葉村家在焉有一雁微茫欲度萬  
重烟水千重樹定何日歸來訪白石荒廬不見見君茆  
宇此地應有詞仙玉簫吹徹冷楓依舊紅舞秋雲不  
掃趁秋晴欸得秋光住便聽到空階碎雨畫屏題滿驚  
秋句更短亭長亭外畫我歸程者般淒楚

眉嫵

題媚蘭小影爲何三夢華

記虛堂隔燕候館延鴻芳意已無限不道相逢處垂簾  
外湘江煙水遙遠素秋未晚看鏡中鴉鬢猶淺儘商略

後夜尊前事問心事誰管 曾見年時幽怨又暗憐孤  
影時弄團扇山下蘼蕪路相思也心香還自成瓣翠蛾  
半歛是昔年今日人面且留在盈盈圖畫對伊喚往年訪夢  
華于湖濱之葛林園見團扇上亦畫媚蘭小影

玉漏遲

紫薇

夜涼秋點靜朱檐一角濃雲欲整曲曲迴廊暗裏有人  
閒凭看了朦朧月色看不了葳蕤花影風漸冷碎紅搖  
動露華消凝 記自蠟淚成堆照樹裏行來玉郎曾並  
愛著宮袍約得滿身光定酒霧懜騰未散比對着殘妝  
猶靚花意暝聲聲佩環催醒

金縷曲

陶七鳧香索賦紅豆小詞荏苒旬日而未成蓋從前綺語深恐懺除不盡率賦長曲用以記歌知此者幸勿闌入東澤債中也

顥顥勺圓矣最漂零蠻烟瘴雨鷓鴣聲裏花落花開無人見留得相思若此問生小團圓能幾十二時中珠淚并看秋鎰尙結垂垂藥緘別恨付雙鯉清歌錯落難重理記年時香消酒醒豔情如水十載填詞三生夢此夢從今喚起有翠袖天寒之子定悔相思深相惜笑尊前誰是紅兒比拋不盡一彈指

霜葉飛

袁三湘湄招同朱九鍊門郭十三頻仰集西湖大佛院僧樓聽雨落葉滿窓聯句縱橫侵晚方罷湘湄寫四名曰湖上雲萍余記此詞

東雲一點留寒意江南猶有來雁怪他落葉打山窓不  
做樓三面漸入夜燈昏雨顫有人畫出迴波怨且莫補  
遙山怕見了西湖倦態翠蛾齊歛我欲喚起詞仙都  
來證佛三生前事休管水萍風絮已無多游興而今倦  
且料理清尊共欸尊前人近天涯遠又段家橋邊寺陣  
陣霜鐘五更敲斷

蕭

掄

字子山太倉人諸  
生有判花閣詞

南浦

春雲用碧山韻

幾疊是春波被東風扶起半空搖影點破蔚藍天輕盈  
甚依約鬢痕臨鏡楚峰春淺一絲搖曳陽臺恨回首湘

江烟水濶不其落紅流盡  
連朝睡醒潛虬玲瓏試舞  
儘饒游興做弄出春陰紅樓裏認煞柳絲烟暝斜陽閣  
住飄飄不似青山靜待喚仙人同載去倒看花田千頃  
又 春草用碧山韻

只是亂烟痕被東風吹向長堤勻染一帶碧連天萋萋  
甚似共蔚藍栽遍踏青人去鳳鞵剛印春痕淺還替飛  
花深護惜擎住軟紅香片 紛紛滿地斜陽風光都付  
啣泥紫燕鬬草憶年時相思處認取愁根一點美人何  
許楚香空寫騷人怨那更王孫從此去凝望短長亭遠

掃花遊

和碧山綠陰韻

東風竟杳更不似殘春亂紅迷路嫩枝蔭處但層層碎  
翦碧雲無數綠到琴書不獨低迷院宇暗凝竚尙錯認  
遠山空翠涵樹閒情渾自許記輒踏花茵暗香隨步  
蝶蜂老去正扶疏遶屋待詩人賦還勝秋林一點殘黃  
弄雨亂烟暮被青青總勾留住

又 咏雁用碧山韻

霜天夜迴帶一片邊聲到江南住幾行倦旅學迴文錦  
字怨啼愁賦篆破寒雲波磔不堪描取渺何許但殘日  
半山秋老紅樹憐伊歸夢阻認紫塞蒼茫亂烟平楚  
伴他杜宇便啼殘清淚此情誰語斷岸蘆花怕帶斜風

細雨避無處又秋聲一聲聲苦

踏莎行

嬾炙鵝笙慵添鴨炷舊愁都向睂峰聚一春長自掩窓紗而今已是春歸去枕上啼痕書中別緒後期前約都無據畫廊清晝更無人倚闌閑共鸚哥語

卜算子

幾度悔相思猶倚秦樓等淡月疎風葉滿庭時見寒鴉影酒病何曾病夢醒何曾醒拚盡今宵長短更翠被餘香冷

摸魚子 舟中聞雁

正扁舟客心孤怯安排今夜無寐雨聲管住孤篷脚一  
陣峭寒侵被曾聽未有嘹唳征鴻話出飄零意一聲聲  
起漫飛向秦樓喚回清夢教寫錦書字 淒淒語似話  
羈孤萬里回頭榆塞烟紫憐儂一樣離家苦暗共商量  
心事秋暮矣看江北江南落葉今如此渺然烟水恰一  
枕無眠幾聲如訴聽向荻花裏

又 同吳項儒張子和孫子滿鮑凌客攜樽餞陳筠樵入都值菊花盛開座客澄江翁芝爲畫東籬載酒圖題此贈別

算年來別離已慣舊愁新恨都有舊時河上春光暮相  
約旗亭沽酒曾憶否是那處紅樓樓外花如繡離懷今



又但秋水秋山秋風秋雨秋老菊花瘦 停杯話屈指  
酒徒詩友相思誰寄紅豆送君此去燕臺路應喜舊游  
如舊還把袖只小立河干我已銷魂久且休分手試擷  
取寒香一枝持贈比似灞橋柳

雪獅兒

蘆花

迷離霧白搖曳烟輕一叢叢秀剛逗西風訝是楊花飛  
又詩人歐九問管底生花知否却都傍丹楓樹下白蘋  
江口 繫艇滄洲前後看粘蓬點點似霜華厚沽酒相  
尋窮士此中應有晚來寒驟正白袷待裝綿候閒回首  
一片秋容添瘦

摸魚子 舟行見蟹簾

正江頭稻芒輸了隨潮殼蛻還長編蘆界破溪流碧不  
礙輕舟來往舟乍響笑航底爬搔似倩麻姑掌鷺鷥灘  
上看輯箇漁莊不成茅屋約略小舟樣 寒烟外漁火  
一星微亮爬沙聲起蘆港乘流欲過前汀去奈被緯蕭  
輕障波蕩漾算截住中流肯把橫行放蕭蕭荻蔣好拾  
取尖團貯來簪簪攜去換卮釀

浪淘沙 旅思

獨自剪燈花風透窗紗寒蟬啼罷又啼鴉已是秋聲聽  
不得何況天涯 叢桂帶霜華涼月痕斜好花明月是

國朝詞綜二集卷七  
誰家却憶雁兒情更苦只傍蒹葭

望湘人 萍

是前身柳絮今日綠波一般飄泊如許乍到圓成又看  
界破怨煞一枝柔艣遠水浮青冷風弄碧教誰留住帶  
幾鷗殘夢零星蕩漾半灣烟雨想值春光欲暮約飛  
花小片翠交紅聚暗粘上柁尾獨客幾回看取行蹤杳  
杳故人何處綠滿當時南浦儘點點揉碎離魂付與纖  
鱗啣去

國朝詞綜二集卷八

青浦王昶纂

孫延 六首

蔣徵蔚 二首

嵇文煒 一首

董國華 十一首

董國琛 二首

汪初 九首

沈星煒 十二首

史麟 三首

楊承憲 九首

戴延介 九首

馮珍 二首

陶梁 十二首

王紹成 二首

孫

延 字壽之吳縣人  
諸生有海月詞

蝶戀花

初夏

一樣花開紅爛漫偏是將離斷送東風轉燕子不知人  
意嬾呢喃只把愁心喚 亞字回闌空倚徧風過遊絲  
攪得茶烟亂望裏不知春近遠綠陰遮斷閒庭院

惜秋華

秋蟬

未替鳴蛩聽殘聲傳出疎林秋晚抱葉翅輕幾迴欲嘶  
還咽遙隨隱約孤砧似也訴愁心一片淒惋正衰柳風  
酸枯槐露淺 寂寞舊庭院早凝妝憔悴鬢痕零亂碧  
樹無情幽夢被伊頻喚倘嫌斜日陰空應有意綠雲重  
選休羨算天涯故枝堪戀

燭影搖紅

爲何夢華題媚蘭小影

靜碾湘縑墨丸寫出幽蘭笑垂楊漏月未分明淡淡眉  
痕掃蝴蝶一生夢好況東風放春閒了那堪半晌醉粉  
迷香空羸懊惱吟篋相隨真真喚盡爐煙裊柔魂猶  
自繞西冷細雨重門悄擬遣漁舟還棹想仙源都應能  
到卻愁逐水遍處桃花碧溪煙渺媚蘭天台人

壺中天

寒雲

天垂平幕似重重遮斷西風來路出岫翩然無倚著欲  
散又還凝聚閣暝催寒摩空釀雪熨起千層絮山巾乍  
著窓中旋失遙嶼終被朔吹飄飄亂雅聲裏歸擁煙

村樹孤客驚心帆落後一片蒼江歲暮雁磧峰高龍沙  
堆遠中有征人戍回看萬里射雕知在何處

揚州慢

上巳紅橋雨泊

日約重三橋尋廿四誰判夢雨廉纖困江湄初客鎮天  
氣懨懨欲喚起康郎織面雲拖煙卷不逗青尖甚名園  
水檻依然挂上重簾游情多苦怕香泥吟屐雙黏悵  
倚柳城遮傍花村近顫盡風帘料得湔裙伴少餘寒凝  
猶怯單衫聽檣梢燕子春深話到呢喃

浪淘沙

釣魚臺同顧大南雅作

野興郭門西春影霏微亂泉一帶繞魚磯行到柳深深

處歇頭上鶯啼 絲雨隔煙飛漫點征衣客情鄉思總  
淒迷一樣東風寒食路落盡棠梨

蔣徵蔚

字應質元  
和人諸生

江南好

青溪一曲

青溪好一曲澱湖開蘆葉田荒明蟹簍柳枝船小貫鱸  
腮煙水小潞澗

又

五峰拱翠

青溪好樓上五峰橫落木微尋村市迴遙嵐隱見夕陽  
明僧寺遠逾清

嵇文煒

字添梅無錫人諸  
生有一竹餘音



摸魚子

壬戌重九前五日走訪青餘不值因坐緣天深處以當晤言明日青餘以詞見示爲譜此答之

步重陰溼雲貼地閒將屐齒牽引偶然轉到尋詩路揭  
動半窗蕉影花氣靜又恰似風風雨雨吹來迤遙情不  
定便蟾許爲賓鷗難作主何處把秋問空孤冷離外  
霜枝尙嫩幽懷卻早香沁還憐瘦蝶飄衣粉憔悴幾分  
誰省淒夢醒托一管瓊簫寄語驪仙聽南山未隱且開  
閣延青傾壺浮綠長嘯破煙暝

董國華

字榮若號琴南吳縣人貢生候補訓導有香影庵詞

憶舊游

曉入穹窿上復觀用玉田生長春宮韻

望松陰鎖翠石氣皴藍絕頂秋晴金碧開樓觀映亂峯  
一帶深護空青曉暎欲上林際幾點掛殘星正天樂洽  
冷步虛渺渺洞府晨清閑尋問靈跡愛磴接高厓泉  
咽寒聲道赤松仙去在此中采藥曾住千春落花何處  
塵境喚客有鳴琴但徙倚層臺滿身涼影知是雲

滿庭芳

寧邦寺在穹窿山後精藍數椽山徑旋折從黃葉中拾級而入澗瀑作聲人籟俱絕門前鳴脚四株參天蔽日數百年物也老僧掃葉煮泉水餉客且云此地幽寂雖春時游蹤亦罕至者古人云山靜如太古默坐良久益悟其妙

墜葉封谿亂峯繞屋穿雲境換幽深香茆十笏一半隱  
秋林不獨喧蹤遠絕鐘魚寂冷到禪心消凝久寒泉細

咽清韻戛瑤琴 高柯留舊蔭石闌層折都籠涼陰笑  
人間游客誰復解相尋彌勒龕如借與蒲團坐圓破塵  
襟山中靜真疑太古并少斧樵音

夜行船

本意同鳧香作

料峭東風偏作冷掩重衾餘酣欲醒中酒心情孤吟滋  
味且壓一蓬春影 渺渺魚波渾不定擊漁榔清歌同  
聽懊惱長年數聲柔櫓消受水天人靜

浣溪沙

背着銀釭伴寂寥新愁未了舊愁撩可憐人度可憐宵  
香恨深絨紅荳蔻秋心欲碎綠芭蕉夢魂如水不禁

消

又

小病恹恹掩鏡臺  
藥鑪烟裏送春回  
小園一月未曾開  
蝴蝶那知人意懶  
撲簾猶是舞低徊  
薰篝閒了踏青鞋

綠意 綠牡丹

翠痕乍斂借油闌  
柔曲扶住春色艷  
欲成烟一種丰神  
莫辨誰花誰葉迷  
離倩影渾疑夢又  
看到濃陰時節怕  
東風吹散天香化  
作滿庭愁碧 猶記  
華清曉起雲鬟  
彈十八恁樣標格  
蛾月窺簾穩宿枝  
頭只有一雙蝴蝶

生綃不用燕支買略點染畫眉殘筆倘許儂池館分栽  
十斛明珠判得

憶舊游

秋寺

問招提何許門堆落葉徑護殘烟一片尋秋意趁西風  
料峭來訪枯禪迴廊夕陽斜處閒了舊闌干便鐘梵涼  
音杪櫺暮影也作荒寒淒然經臺靜歎蓮花香老冷  
到蒲團天半琅琅轉似勸人且住鈴語清圓重來舊游  
還認題壁墨痕鮮笑過客空忙裁雲補衲僧自閑

一萼紅

秋花

粉牆陰綴孤芳數點香意入涼深露眼猶啼風絲欲顫

描出一片秋心夕陽外三分淺暈壓闌干紅影學春痕  
綠褪荒苔黃飛敗葉同作飄零 穠艷者同都盡剩嬾  
蜂瘦蝶依舊相等霜信猶遲烟雲漸老花事誰問園林  
不是錦屏旖旎算折枝也上美人簪只有一丸冷月來  
照黃昏

長亭怨慢

秋燕

問何事雕梁棲隲一翦西風又驚秋信乍到新涼暮痕  
偏覺故巢冷錯疑歸緩猶自卷湘簾等閒巷淡斜陽替  
畫出雙雙愁影 重省記黏花拂絮不道者番春褪似  
聞怨語說王謝繁華消盡算社後幾許光陰先催作海

天離恨盼明歲飛來細把絲絲紅認

一萼紅

游慕園同竹友琢卿作

過牆陰有舊家池館  
水木自幽深  
壞甃塵封曲廊草沒  
贏得幾許傷心已換了當時烟景  
裊絲絲楊柳爲誰青  
惆悵花叢亂紅如雨減盡香痕  
莫話平生往事  
賸棲雅數點來弔黃昏拾葉裁詩  
臨波照影蒼涼滋味難禁  
歎彈指繁華似夢立東風一度一銷魂  
閒煞闌干十二  
不倚春人

天香

蘆簾

薄訝浮烟輕於翦絮  
夕陽一片秋影低垂  
網戶蕭蕭瑟

瑟引我江湖吟興西風作雪記臨水數枝搖暝回首涼  
汀深處曾護閒漚眠穩 荈檐者番淒冷掩雙鈎怕催  
霜信可奈疎花瑣碎似儂愁鬢孤月黃昏相映便也學  
湘紋蕩難定夢落魚波寒聲獨聽

董國琛

字琢卿吳縣人諸  
生有香葉山館詞

憶舊游

秋寺

看依然梵宇落木蕭條淺露紅牆一杵鐘聲冷又琅琅  
塔語併作淒涼祇應證到無隱禪味悟天香漸暝入高  
樓僧衣猶曬寒認斜陽 難忘舊游處聽暮鼓沉沉佛  
火昏黃幾陣杪櫺雨和西風料峭頻打空廊不道重來



初地煙景換蒼茫只踏葉敲門山中獨訪居士龐

一萼紅 秋花

數華叢算連番花信無此可憐紅淡沁芳心涼消香骨  
園林光景匆匆又引出當時鶯燕悵重來不是舊東風  
古木槎枒荒藤婀娜同老秋容一片芬華未歇便動  
人淒冷那比春穠瘦朶籠烟芳姿浥露寒艷只傍簾櫳  
恰扶上滿身疎影有闌干都在夕陽中腸斷枝頭倦蛭  
夢亦惺忪

汪

初字絳人錢唐人諸  
生有滄江虹月詞

點絳脣 晚泊

分付西風將愁捲向江天去蘆花留住問我愁來處

六尺蜻蛉小繫橋灣樹迎寒霧月稜半吐夢逐征鴻語

### 虞美人

一番離緒還如舊春事今年又無邊江水接天流鎮日  
教人天際識歸舟金鍼倦繡鴛鴦譜却去調鸚鵡樓  
前柳色綠初勻莫被東風吹皺小眉痕

### 南鄉子

香露濕春衫風送飛花撲繡簾記得年時修禊返初三  
月子彎彎映短檐心事竟誰諳銀燭光搖冷玉簪幽  
夢應隨蝴蝶去江南碧柳千絲水一灣

南樓令 旅思

明月小簾櫳闌干倚晚風送秋聲多謝梧桐長簾拋殘  
紈扇冷憐客夢太惺鬆身世感飄蓬鄉書遠未通聽  
遙天過盡征鴻悶把西窓開一扇人不見水連空

解連環

讀秋卿所製春雪詞依調奉和

春痕零亂捲一簾殘夢和雲俱遠問綺窓畫就寒梅誰  
洗却胭脂粉奩偷染指冷瓊簫錯認是江城哀怨訝垂  
楊幾樹落盡香棉未開青眼紅絲舊情猶戀歎因循  
誤了玉河雙燕記衝寒小立溪橋曾點上征衫迷離成  
片深院重來又堆起新愁無限到明朝暖玉生烟綠蕪

尚淺

高陽臺

綠樹庭陰輕風簾幕楊花撲帳無聲被冷鴛紅捲來鄉  
夢分明尋常一樣窓前雨到黃昏倍覺難聽鎮無聊數  
盡更籌耐盡燈青 雙鬟莫唱江南好想故園芳草綠  
遍西冷燕子朝來煩他絮語丁寧春歸已久人歸未誤  
金閨錢卜無靈更那堪水隔山遮酒淺愁深

青杏兒

別意

底事暗銷魂記去年花下逢君今朝獨倚高樓望青山  
隱隱綠波淼淼紅雨紛紛 羅袖漬啼痕盼春來却又

傷春繁華舊夢俱拋捨梅邊玉笛樽前檀板月下銀箏

齊天樂

初夏至湖上作

朝來靜拭紅塵眼青山對人如笑糝綠千林涵空一鏡  
畫出南屏清曉遊船開到想前度桃根舊情未了分付  
鶯兒護他香夢莫驚覺 鸞箋書就小草殷勤餘翠墨  
留換春稿踏遍雙堤閒心一片曾向白鷗傾倒輕紗扇  
小試招取湖光染衣多少回首禪關萬松清磬杳

聲聲慢

題吹簫仕女團扇本

林空散靄逕窄留雲春痕淡到梅邊笑顰煙鬟釵光兩  
兩爭妍瓊簫恁時攜得把花梢月影吹圓凝神處愛脂

香微度半攏春纖 白石新詞誰唱想垂虹橋下煙景  
依然深院梨花銷魂不似從前風搖碎陰如活酒輕衫  
墨暈斑斑清夢遠看秦臺飛下彩鸞

沈星煒

字吉暉仁和人監  
生有夢綠庵詞

綺羅香

秋雨聞歌

溪影涵雲簾波捲翠滴碎梧桐疎雨檢點秋光誤了幾  
番芳序步苔階羅袖添寒似春前晚風吹絮問飄來何  
處歌聲淒淒做出甚情緒 闌干還又倦倚猶記妝筵  
夜暖低迷香縷重把淚珠偷聚曾信有笛裏關山又那  
識曲中羈旅待明朝試覓簷花應隨流水去

青玉案 水僊

東風不記凌波步但憶徧青谿路脈脈幽情誰共訴半  
簾殘月一襟清露那是春知處雨煙回首迷芳杜難  
把冰弦寫心素悔煞當時留一顧至今贏得碧雲日暮  
猶說陳王賦

臺城路 秋草

天涯望斷疑無路愁連去帆俱遠野色淒迷塞雲迢遞  
分得斜陽一半舊游零亂任老却青袍西風不管憔悴  
王孫又催鄉思到吟卷玉階謾尋消息暗蛩啼不盡  
多少哀怨袖底黏香詩邊紀夢回首年華都換秋宵影

轉牘點點流螢撲翻輕扇門巷誰家空簾和月捲

南樓令

何處采芳蘋隔江秋水深憶歸帆千里消魂恨煞楚天  
新雁字空送盡一程程夢去但爲雲相歡意最親怕  
愁來和夢都醒爲問月明今夜裏照幾許別離情

滿庭芳

春去難歸人歸未卜閒情悵觸倚調成詞

碧草平烟綠雲飛絮舊家池館春深倦聞鶯語簾幙晚  
風輕望處翠陰低浣冷斜暉深掩重門閒惆悵瑣窓雨  
細濕了護花鈴新愁知幾許斷紅心事芳訊難憑便  
賦情猶在誰共登臨還怕樓頭夜笛一聲聲吹破黃昏



無慘甚三更殘夢仍是未歸人

### 高陽臺

翠袖籠寒畫欄凭曉傷春惜別年年天與多情自應費  
了吟箋楊枝不管人憔悴又絲絲脫盡香綿恰淒然一  
點相思瘦也誰憐片時南浦分離夢問東風何處吹  
去秋千綠酒青樽能消幾度花前花開已是愁如許到  
花飛更落誰邊怕窺簾滿徑殘紅滿地榆錢

### 洞仙歌

早秋同人相邀泛湖作竟夕遊余託疾未赴是晚頗涼涼與問樵坐池上譜得此闕

露荷開也又夜華如水明月西樓鎖烟翠向曲闌小倚  
楊柳風多吹不定葉葉瀟疎情致碧雲低欲度銀漢

秋沉一片秋光澹於洗聽徹玉簫聲往事無憑又恰把  
閒愁喚起爲寄語花前弄珠人得消受今番臥遊情味

齊天樂

秋晚登樓望吳山晴碧偶因感舊賦此悼之

雲深不礙看山眼秋光澹拖晴翠落月城陰晚烟樹杪  
愁滿西風笳吹蒼茫坐對看一片斜陽亂翻鴉背載酒  
林亭幾人還向近來醉清游那回倦省故人攜手處  
曾共歡會顧曲情多簪花恨切夢冷舊溪烟水楚蘭憔悴  
便覓相思不堪重綴隔斷空江暮潮聲漸碎

百字令

送問樵之吳門

西風無準把幾行斷雁一繩吹緊喚起離情殘柳外落

月和愁先等曉色津橋荒寒水驛夢逐吳楓冷深宵襍  
被客懷多少清興記否當日扁舟曾經畫取雪浦歸  
帆穩此去闔亭尋舊約添了梅邊新咏紅粉吹簫綠樽  
遞語寫出空中恨舊游休問碧雲回首飛盡

臺城路

人口登水星閣探梅

護春簾幙春先透吟邊漸催春早剪雪情疎浮香夢斷  
消得幾番昏曉湘臯路繞乍竹外橫斜數枝開了飛落  
嬌禽不知芳思爲誰好天寒猶記贈遠被伊頻喚起  
離恨多少寫影東風霑衣殘月可慣無情相惱何郎未  
老尙趁得花前眼空一笑有約重來翠尊須共倒

南鄉子 憶梅

澹月上疎櫺，縹緲梨花入夢雲。紙帳風清吟不得，消魂。  
獨鶴孤山第一聲。翠被夜寒生。春到南枝更幾分。我  
自憶花花憶我，關心一種愁深萬種情。

洞仙歌

晚晴坐月池上見水中梅影偶賦

盈盈照水又一花，初發澹著春痕半。飄忽慣遮來夜色，  
點點疎香吹漸遠。洛浦行雲無跡，橫枝先得月，素壁  
青燈爭似溪頭更清絕。瘦影倚誰憐，疑有疑無更何處。  
泥他消息早勘破，羅浮夢中身恰只是風前水光月魄。

史

麟

字仲仁，溧陽人。諸生有五雲溪漁唱。

小重山

春日雨中

連天烟靄鎖遙城  
暗教風物換又清明  
不知山色幾分  
青春樹外一抹帶雲橫  
聽處只鳩聲  
便鷓鴣期燕約總  
難成閒懷待與白鷗盟  
滄江上雪浪幾時平

卜算子

鷗

雨夜長蘆芽難記  
閒眠處怪煞烟波不斷流  
流夢橋西去  
影外夕陽明雲際  
滄江暮冷眼東風盡日忙不爲  
春帆住

臺城路

秋晚泛舟

沙明水淨秋烟冷  
空濛碧天雲歸蕩  
櫓風柔衝篙浪軟

攪入荒蘆寒蓼閒鷗夢悄問點點蘋花客情多少忙煞  
西風隔江遙認一帆小 聲聲誰弄短篷羨斜陽牛背  
歸路橫繞澹月襟懷新晴物候底事吟情潦草重陽近  
了怕雨雨風風一番愁到幾陣橫空又南飛雁早

楊承憲

字浣薌金匱人監生有過雲精舍詞

木蘭花慢

舟過石湖讀添梅詞集卽題

喜新詞讀罷正沙溆上潮初想竹簟尋秋梅茵坐月吟  
髻慵梳頻向墨香簾裏展花間小帙數行書合付蘋雲  
按拍歌成渺渺愁余 挂蒲曉泛石漁湖涼綠散菰蘆  
只白石風流玉田標韵此外誰如堪羨清游雙屐冷襟

情要與俗情疎我欲同攜鐵笛扁舟漾入蓬壺

浪淘沙

重陽

薄髻綰朝妝鑪篆心香人言此日又重陽細雨斜風簾  
不卷添倍新涼閣淚悄神傷無限思量盈盈閒凭小  
回廊踈柳幾枝鴉數點流水紅牆

意難忘

將賦南歸家紹之餘飲柳湖賦此誌別

蘆花荒灣只匆匆別袂草草離筵遙山青欲合分翠上  
春衫花碎錦柳飛綿落日盪波圓道故園者番歸去正  
好湖山載書鼓柁堤邊愛蘋花蘋葉點破江天采香  
人去久小舫夜無眠星似豆月如煙逸興倍悠然約何

悵題紅夢杳描月香殘片石冷秋水小字鐫題好靈瓏

甚章臺曾鬥腰細

硯背鐫秋水閣小印印上有如是小款

雙聲句麗認墨

痕黏住情膩正垂影吹綠牕前柳啓奩寫眉翠

猶記

歲華撚指

硯右有壬午二字

嘆故園春寂紅豆拋碎脂粉銷情

劫凝光暗模糊賸點鉛淚裝璜襲綺問夜臺豔魄知未

趁淨几摩挲時有墨雲吹起

三姝媚

雲隱庵木犀二株交柯接葉相傳宋元時植也暇日往游憩玩忘返少焉明月在空暗香撲鼻殊有躡足廣寒之想倚醉歌此以寫曠懷

霓裳仙珮冷便吹墮祇林鎮留雙影拂拂空香引訪秋

騷客來歌招隱寂寞闌干問零落幾回金粉閒立花陰



醉索花扶夢和秋迴 露濕苔階涼沁又兔魄光明暗  
催歸興待約重尋怕飄殘黃雪禪扉深局濃豔都消更  
聽到一聲清磬記取鶴飛今夜廣庭人靜

渡江雲

題述庵先生柳波雲舫圖

春江扶舵去鸞坡望遠高卧水雲寬晴奩試照影卅載  
風塵撲雪鬢蒼寒門前桃李帶上林湛露方鮮指舊隱  
峰圓圓柳尋夢落漁天 倚然蒲帆卸了浩蕩蕪鄉悵  
詞人歸緩且檢點筆牀茶竈遽請琴編難拋夙昔絲綸  
手便忘機尙理魚竿煙水暝一聲棹入蘆灘

瑣窓寒

秋雨

密綴枯荷輕黏瘦蝶釀寒猶淺盈盈濕淚灑上海棠紅  
泣漸涼颼吹斷絲絲遙天又看魚雲滿更晚來攏和疏  
林葉響玉階蛩怨 愁緒更長短記那日宵深梨花庭  
院殘碁荒杵又作 去 西窓悽惋最難禁酒醒香銷數聲  
雁帶櫓聲遠儘由他落盡梧桐一鐙歸夢顫

憶舊游 秋寺

記撥雲尋徑和葉敲門琳宇荒寒小憩招提境看銜花  
鹿瘦補衲僧閒嬉游漸疏裙屐香火已蕭然賸蓮座鐙  
昏珠幢塵暗供養枯禪 流連參寥話合兩三秋士社  
結青泉寂寞經臺畔聽一鈴吹語聲更淒圓折取黃花

呈佛心事冷爐烟待送客昏黃棲鴉軋軋啼正喧

疎影

秋樹

蕭疎院宇又秋風一霎綠陰吹去枝禿霜敲林迴雲淒  
聽盡秋聲來處斜陽明滅荒煙鎖曠幾葉梢頭翻舞更  
夜來飛上銀蟾瘦影空階無數望裏纔舒倦眼只蟬  
衣冷抱鴉點昏聚水曲山厓渲紫飄紅愁入天涯遲暮  
憑誰寫入鷺溪絹恰幾筆倪迂幽趣正攤書人坐孤根  
好伴亂蛩吟苦

長亭怨慢

秋燕

乍愁入烏衣庭院風冷霜濃吳天驚晚絮語雕梁年年

飄泊慣銷黯舊巢誰管便去也尙留戀拂水更梢花恁  
提起舊情多嬾長短度驛亭迢遞那問水深山遠倦  
游滋味增多少天涯悽惋最難忘憐惜紅閨盼不到斜  
陽雙翦但悄立黃昏惆悵畫簾空捲

清波引

孟夏雨中偕非石嬾雲師臧舟山塘小憩  
白公祠遲述庵先生不至坐雨竟日譜此  
以破寥寂

濕雲搓絮正拖屐遠尋古宇黛嵐隱霧嫵媚弄眉嫵剛  
道探幽好驀地飛來涼雨閑庭不見詞仙賸一鶴自來  
去蕭然伴侶岑寂味還共領取品茶欵語山靈定相  
許煙樹旋催暝冷翠撲衣無數放些蟾月朦朧好移歸

觸

馮

珍

字玉如吳江人監生  
有樊桐山館琴趣

滿江紅 春晚

昨夜梨雲幕卷得東風剗地早  
又是殘花飛盡陰陰新  
翠細草一庭微有露曉寒幾陣涼於水  
卷珠簾風柳一絲絲飄來細  
磨不盡年時意消不去愁中味  
只零星舊夢記還重記  
蘭燼燒殘銀鴨冷流鶯啼破  
文牕閉早朦朧聽遍賣花聲  
春人起

摸魚子

寄戴受茲

落殘紅一庭春瘦綺牕清露涼  
逼恹恹酒病人初醒遍

數舊曾相識愁欲絕算清迴南樓一棹剡溪隔闌干遍  
拍正蕉葉敲牕花枝掠檻雲影半簾活 朦朧處幾點  
吳山難覓一種煙霧濃碧去年曾記深宵話也算雪泥  
鴻迹燈更剔只似夢如塵此際難重憶胥江今夕有幾  
折涼波一痕風縠分付亂愁織

陶梁

字寧求號鳬鄉長洲人  
諸生有紅豆樹館詞

疎影

梅影

瓊枝欲舞認苔邊點綴寒色如許雪與招魂月替傳神  
瘦到痕無描處春風先占水溪畔想窺鏡盈盈眉嫵待  
黃昏乍暗還明數點冷雲來去 獨自巡檐一笑暗香

素袖滿判折休誤勾染誰工合就橫窓勾出橫斜生趣  
芳容畫裏偏驚換奈玉笛吹殘春暮悵重尋葉已成陰  
尙記窺簾嬌語

### 高陽臺

歸田王氏園在城隅東北爲明王元珠先生故居百餘年來臺榭半荒而境絕幽勝余以客歲春暮會偕二三同好遊詠其中得甘州子一闕云獸環門掩石橋斜舊池館種桑底溪流分出小人家柳線漸勝鴉斷牆隙開落一年花及今年九月復與蔡竹蘭張絢甫顧南雅沈狎鷗陳俊卿徐少鶴李雅吳巢松林仲鸞張石卿諸人同遊則瘦石枕烟霜林留照但一片寒蕪蔓草而已余悲年華之易去并志斯遊之不可忘也因續成此闕希同遊諸君子繼聲焉

徑窄欹冠林深坐葉西風吹老霜晴牆隙曾題年華飄

瞥堪驚柳絲桃葉迷前度恁重來都作去秋聲逗荒溪  
數點歸鴉換了啼鶯勝流難得占星聚借茶壺對把  
須記幽盟誰戴黃花小樓人倚輕盈沈腰不道和秋瘦  
但年時嬾賦閒情正消凝芳會催闌斜日寒城

徵招

王春宇出山窓掃葉卷屬題詞其上時同客  
萬松書舍山空木落古意蕭颯倚聲歌此殊  
有躡足白雲之想中仙定賞此清致也

霜林漸滿斜陽影西風作意吹去陣陣捲秋煙正打窓  
爭舞牆陰掩暗雨恁吹下深深如許睡起烹茶徑開持  
帚曉來分付客裏餞年華柴門掩清事幾番領取溝  
畔恨無媒自淒涼題句丹黃旋手註定添得秋聲新著



怕故人萬一相尋又亂山迷路

南樓令

葉小鸞眉子研背有二詩署已已寒食題云天寶繁華事已陳成都畫手樣能新如今只學初三月怕有詩人說小顰素袖輕籠金帛煙明窓小几展長牋開奩一研櫻桃雨潤到湘琴第幾絃夢華拓銘見示并索題詞因填此闕

滴露潤微添琉璃展一奩引春愁飛上眉尖洗徧墨痕香不褪帶多少舊情黏過雨捲湘簾櫻桃秀句拈認

玲瓏小印親鈴惆悵碧天鸞去遠空留得月纖纖

臺城路

南湖在武林門東二里樊榭徵君與姬人月上偕隱處也暇日偕友人步履過此古柳蕭疎潭水寒碧詞仙老去曠景悽然卽用秋林琴雅中南湖感舊原韻追和一闕

灣環古水添深冷繞門幾重煙樹桃漿花移鏡奩塵化

消得雙棲詩句吟魂應住認暈遙遙山一痕眉嫵照影  
春空白雲點點自來去清漪還洗詞筆玉田和石帚  
標格差許鶴老閒庭苔荒廢館月好不知何處移官換  
羽歎卅載遲來雅音非故誰炷心香古琴林外撫

解連環

辛酉四月六日隨述庵先生及何君春渚  
送樊榭徵君并姬人月上栗主人耐黃文  
節公祠用玉田生拜陳西麓墓韻

白楊依郭歎逋仙老去空山無鶴鎮吟魂未戀南湖怕  
重覓雙棲舊時門鑰舊隱南湖淥水旁穩雙棲處  
轉思量樊榭悼月上句也惆悵

春風又卅度棠梨花落只泉臺月好聽取珮環聊慰蕭  
索幽靈酌酒應却泣故人高義千古如昨況辨香分

國朝詩集二集卷八  
三  
占涪翁伴荒殿吟蛩廢龜飛雀艷魄同招恐夢裏雨聲  
迷著記西冷安神曲就定傳夜壑

高陽臺

秋雲

澹影遮山寒雲護雁微茫難寫蒼穹尺幅羅紋卷舒遙  
認晴空聚愁幾片天邊暝又涼颼吹去無蹤任悠悠低  
抹平林不作奇峯年年只寄荒厓宿被攪將黃葉洞  
口都封出岫仍閒爲霖心事偏慵夜闌河漢微微度問  
相思天末誰同映丹楓縱有餘霞不似春濃

惜秋華

秋蝶

翅冷西風弄年年草色低迷荒圃花底一生飄零舊香

何許殘蕪換却繁華  
渾夢裏尋春無路  
愁緒只閒描瘦影  
空階來去  
佳約又前度  
縱輕羅小撲暗憐遲暮  
那寬艷遊一點冷紅  
款住畫圖試搨滕王  
早半脫粉痕金縷  
芳侶問南園再相逢否

探春慢

澹綠樓聯句

公鳥穿林疎蟬抱葉  
人在翠雲深處

青浦王昶

漾地簾低鋪

池荷小銷盡人間煩暑

梁

篩亂斜陽影被一徑檀欒遮

住

昶

水窓占得風多細香吹上詩句

梁

俯仰偏愁日

暮記白紵烏紗東華塵土

昶

棐几橫琴石闌點筆且領

此中幽趣

梁

一楊追涼好華胥引夢魂飛去

昶

喚醒芭

蕉綠天幾點疎雨

梁

賣花聲

李香君小影

薄暈臉烘霞雙鬢堆鴉香名千載屬侯家  
賸粉零脂無著處飛上桃花  
風月譜紅牙往事堪嗟板橋依舊夕陽斜  
却笑南朝渾一霎扇底繁華

齊天樂

琴德居爲述庵先生賦

飛塵不到空山裏冷泠靜聞琴語  
斐几香清石牀甌冷閒倚松邊揮塵  
百年小住問悟到聲希知音何許挂壁  
無絃白雲簷畔自來去  
長安舊時歸隱算繁華眼底功名休數  
流水追涼清風入夢穩臥溪山佳處一鷗寥

宇笑喧耳箏琶不關天趣鎮日悵悵此中尋太古

臺城路

壬戌十一月六日自漕溪放舟游澱山時風日晴霽滿湖帆影歷歷如在掌上遠望九峯玲翠若滴坐石上眺覽移時薄暮撥棹歸游圓津禪院僧慧照具蔬茗款客談至月上始返舟中聯此闕以志清游

瘦筇如喚登臨去霜花撲衣寒峭

梁

樹老撐雲碑殘蝕

蘚弔古易添愁抱

鎮洋彭兆蓀

平波渺渺認薛澱風帆參差

林杪

嘉定錢侗

才展斜陽遠峯九點忽飛到

梁

探幽漸疏

裙屐苔痕荒徑滿古院僧少

兆蓀

逼暝鴉啼催歸磬響羸

得清游未了

侗

禪關掩悄又半晌茶烟髻絲添惱

梁

待

送船頭一彎山月小

兆蓀

王紹成

字繹如青浦人諸生

高陽臺

歸田園記游圖爲鳬香作

墜葉風梳荒苔雨漲故家門巷  
悵悵蠟屐來游黃花遮  
住秋陰舊巢燕子分飛去剩  
依稀簾幙重尋更無端一  
霎寒雲吹滿空林  
朋儕還喜尊前聚算淵明句好三  
徑微吟木落鴉啼不堪重喚登臨  
而今半是天涯客對  
盟鷗引起愁心想明年醉把茱萸容我題襟

又

西湖春感用玉田生韻

蝶徑香殘鷗波水暖還來載酒呼船  
憑解愁圍尋芳空  
憶年年柳陰深處游絲裊問飛紅更有誰憐最消魂斜

倚蓬牕裙褶拖烟 從今別恨添多少正風迴小院雨  
洗平川剩粉零脂知流第幾橋邊東君已遣春歸去又  
何人喚起春眠望湖樓一種閒情付與啼鵲